

Ekwo-ozì, Pòlu Deru Nù Ndu Kòlosì

1 ¹Òwa-a bụ ekwo-ozì, mụbe Pòlu ede. Mu bụ onye Chileke họtaru mee gę mu buru onye-ishi-ozì Kéreshi Jizọsu. Onye mu l'iya gba mgba ede iya bụ nwanna anyi, bụ Timoti.

²Ndu anyi ede iya anụ bụ ndu kę Chileke; mbụ ndu ọphu nọ lę Kòlosì, bụ unwanna anyi ndu ọphu nọ l'ęka Kéreshi.

Mu sụ gę Chileke, bụ Nna anyi yele Nnajiuphu, bụ Jizọsu Kéreshi meeru unu eze-iphe-oma; l'o mekwaapho g'unu buru l'ęhu-guu.

Epfu anụ Chileke ekele iya ekele

³Anyi anọdujeephe ekele Chileke, bụ iya bụ Nna kę Nnajiuphu anyi, bụ Jizọsu Kéreshi mę anyi -nọdu epfu opfu ęhu unu anụ Chileke. ⁴Noo l'anyi nımawaru g'ekwekwe unu shihuberu ike l'ime Kéreshi. Anyi bya anụ-maakwapho l'unu yeru ndu-nsọ obu g'ęphe ha. ⁵Kęle unu ele ęnya iphe, a kwakọberu unu l'imigwe; mbụ iphe ono, e meru; unu maru teke ono, a byaru bya ezia unu ozi-oma ono, bụ ọkpobe-opfu ono. ⁶Ozi-oma ono erekwa ire l'ękameka bya atụkoakwapho mgboko ejedzuru. Ọ buru ęgube ono bụ g'o jedzuru ęka unu nọ bya ere ire lę ndzụ unu e -shi mbọku, unu nımaru iya; o doo unu ęnya ree; mbụ iphe, eze-iphe-oma Chileke ono bụ.

⁷Ọo Epafurasu, bụ onye anyi yeru obu; onye anyi l'iya tükoru eje ọdu ozi lanụ bę bụ onye ziru unu ozi-oma ono. Epafurasu ono bụ onye goshiwaru lę ya bụ onye e gude ire iya ęka l'ęjeru Kéreshi ozi; ọ buru iya nọ-chiru ęnya anyi l'ibe unu; ⁸teme ọ buru iya pfuru anyi kę n-yemobu unu ono, shi l'ęka Unme-dụ-Nsọ ono.

⁹Nokwa iphe, meru g'o gude ębe anyi atuwojeduru ęka l'epfu anụ Chileke l'iswi ęhu unu; g'o mee g'unu makotajeru iphe, bụ uche iya; waa k'ọphu mmamiphe, shi l'ęka Unme-dụ-Nsọ edoje ęnya ree. ¹⁰Ọo ya bụ g'unu emejekwanụ umere, l'e-me gę ndzụ unu l'ọphu buru iphe, unu l'ęgude akwabę Chileke ùbvù; teme unu emekwapho iphe, dụ Chileke ree l'iphemiphe, unu eme ememe. Unu eshi ęgube ono meje iphe, bukpo

iphe-oma tekenteke; kakwapho amarweta onye Chileke bu. ¹¹L'o gude ike iya ono, du biribiri mee unu g'unu shihu ike okpobe eshihu; k'ophu unu a-duje ike gude ata nshi nwejeru obu l'iphemiphe, byaru unu. ¹²Unu egudejkwapho ehu-utso keleje Chileke, bu Nna ekele. Noo l'oo ya bu onye meru; unu buru ndu gbaru g'unu le ndu-nso gbaru mgba l'iphe, o kwakoberu phe l'eka ono, bu iphoro dukota iya ono. ¹³O dzotaruru anyi l'eka ochii nweru ike bya eworu anyi je edobe l'eka Nwa iya, o yeru obu bu eze. ¹⁴O buru iya be e shi l'anwuhu iya gbata anyi; bya agukwaarupho anyi nvu l'iphe-aji.

Onye Kereshi bu me iphe, oomeje

¹⁵Oo ya bu ugbugba Chileke ono, a ta ahumajedu lenya ono; bya aburu iya be Chileke doberu l'okpara l'iphe, bukpo iphe, o meru ememe. ¹⁶Noo kele oo l'eka iya be Chileke shi mekota iphe, bukpo iphemiphe, bu ophu du l'imigwe me ophu du le mgboko; ophu enya ahumaje me ophu a ta humadu lenya; mbu ndu eze ojozi-imigwe; me ndu bu nnajioha; me ndu ochi-oha gephe hakotakpo; me ndu ophu no l'oke okwa, nokota l'imigwe. Oo yebedua, bu Kereshi ono be Chileke shi l'eka iya mee iphemiphe kpo; teme o buru iya be o meru iya doberu. ¹⁷Yebedua lonwiya vukota iphemiphe uzo duhaadaa. O bukwarupho ike nkiya be o gude mee iphemiphe, Chileke meru ememe; o dukota l'eka Chileke doberu iya. ¹⁸Oo ya bu ishi, kpo-pfuru l'ogwehu iya ono, bu Chiochi. Oo yebedua bu eka ndzu l'ophu futaru. O bukwaru iya pho bu onye ivuzo, Chileke meru o shi lonwu teta nodu ndzu; k'ophu oo-buru iya a-kakota shii l'iphemiphe, Chileke meru ememe. ¹⁹Oo Chileke be chiru iya l'obu iya mee go buru l'ehu Nwa iya be aa-huma-gbukpo iphemiphe. ²⁰Waa goo bukwarupho l'eka Nwa iya ono be ya e-shi mee ge yele iphemiphe, no l'imigwe me ophu no le mgboko du le ree. Ya eshi egube ono gude mee ono, Nwa iya gbashiru loswebe ono mee g'opfu ta aduheru yebe Chileke yele iphemiphe, o meru ememe.

²¹Noo l'o nwekwarupho teke unubedua shi buru ndu anodu Chileke l'eka. O buru ejo-iphe unu shi anoduje ari loriri; eme iya l'umere be shi mee; unu buru ohogu Chileke. ²²Ole nta-a be Chileke shi waa le ndzu, Nwa iya shi nodu l'eliphe-a waa anwuhu, o nwuhuru; mee g'unu l'iya du le ree; k'ophu Nwa iya ono e-duta unu; unu aburu ndu duru Chileke iche; o to dudu iphe, aata unu uta iya; ophu unu abuduru ndu aamaru ejo eka jasu l'o duta unu bya apfube l'iphu Chileke ono. ²³Ole iphe, unu mefutaje bu l'unu a-pfushi ike l'ekweta unu; kpo onwunu gabara; ophu unu ekwedudu g'e mee unu g'unu wofu obu l'iphe ono, unu ele enya iya ono, bu iya bu ozi-oma ono, unu numaru ono, e zidzuru mgboko mgburugburu ono; bya abukwaru iya pho be Chileke ziru mbedua, bu Polu ge mu je ezia ndu ozo.

Ozi, Chileke ziru Pọlu g'o je ezia Chiochi

²⁴Nta-a bẹ ẹhu atsokpoo mu uto; kele o unu bẹ mu ejedoru iphe-ẹhuka-a. Noo kele o iphe-ẹhuka-a, mu eje nta-a bẹ mu gude eyeta ẹka eme g'o dzukota mbu iphe, phodukwaduru l'iphe-ẹhuka ono, Kereshi jeru jedoru ogwehu iya ono, bu Chiochi. ²⁵Oo Chileke ono, bu onye hotaru mu nu ge mu buru onye-ozu Chiochi bẹ ziru mu ozi ge mu zia unu; ge mu mee unu g'unu tuko iphe, ya pfuru makotaru; ²⁶mbu iphe ono, o shi domia edomi eshinu o meru mgboko ono. O be nta o bya egoshi iya ndibe iya, du nso. ²⁷O buru phe bẹ Chileke hotaru le ya e-goshi iphe ono, nyiberu anyibe ono, e shi domia edomi l'anya ndu abudu ndu Jiu ono, bu iya bu li -nodu Kereshi l'eka; li buru onye e-mechaa gbua nwijnwii. ²⁸Oo opfu ẹhu iya bẹ anyi anoduje asa kpa kpa g'onnyemone numa-a; alo onnyemone ẹka le nchi gude mmamiphe ezi iphe k'opfu anyi e-me onyenu g'o buru onye no l'ime Kereshi buru onye debe ree. ²⁹Noo g'o gude mu nodu anoduje eseshi akanya ike; kukebe ẹhu eme ge mu e-me jebe ozi ono, Chileke ziru mu ono. Ike, mu gude eje ozi-a bẹ bu ike ono, Kereshi eyeje mu l'ehu ono. Noo ike, lere ire l'ehu mu bu onoya.

2 ¹Iphe, mu eme g'unu maru bu le mu ese akanya unu eseshi iya ike; me akanya ndu Chiochi, no le Layodeshiya; mewaro iphe, bukpo ndu ozo, mu l'ephe teke ahuma-swee le ndzu-a. ²K'opfu obu e-shihu phe ike; wafua g'ephe tugba buru nanu le n-yemobu; oo ya bu g'ephe abya amaebekporu okpobe-opfu ono; e-shi egube ono iphe ono, Chileke shi domia edomi ono edoo phe enya ree, bu iya bu ke Nna yele ke Kereshi. ³Oo l'ime Kereshi ono bẹ Chileke domiru iphe, bukpo ẹku, du le mmamiphe yele nkwananya l'opfu.

⁴Iphe, mu gude epfu iphe-a bu k'opfu o to dudu onye a-bya egude ire mecha mecha duswee unu uto. ⁵Kele a makwaru-a le mu ta anodu l'eka ono, unu no ono; ole o kwa-a l'eka ono, unu no ono bẹ obu mu du. Iphe, atsoje mu uto bu g'unu gude mekobe onwunu buru nanu waa g'unu gude buru enwubata enwubata lekwekwe, unu kweru ke Kereshi.

Jizosu bu nnajioha

⁶Oo ya bu; eshinu unu gbobewaru ẹka labo nata Kereshi Jizosu o buru Nnajiuphu unu; unu l'iya tugbaekwapho buru nanu kwaseru. ⁷G'o bukwarupho goshi agbabeje ogbarabvu l'ime ali-a bu g'unu a-gbabe ogbarabvu l'ime Kereshi. G'o buru Kereshi bẹ l'a-buru okpa-ulo, unu anodu akpu ndzu unu l'eli iya. Unu akabaa ekweta iphe ono, e ziru unu ono kweshia ya ike. Unu egudejeepfu obu unu g'o ha ekele iya k'anyinyi.

⁸Iphe, unu akwaberu enya bu g'o to du onye e-gude mmamiphe nwomaru-o-machata me ugho, enwedu ishi bya aturwua ekweta unu. Iphe ono bukota iphe, shi l'iphe, ndiphe ezi; bya aburu iphe, a toru okpa

iya sù g'e tsoje, bụ iphe, eshidu Kéreshi l'èka. ⁹Noo l'ọo l'èhu Kéreshi ono, byaru bya aburu nemadzụ ono bẹ Chileke l'onwiya byaru bya edzua oke egoshikọta onye ya bụ. ¹⁰Chileke bẹ shiwaa l'èka Kéreshi ono, unu l'iya tũgbaru bũru nanũ ono mee gẹ ndzũ unu dzua oke. Ọ bũru Kéreshi ono bụ onye-ishi, kakọta iphe, bũkotakpoo ndu ọchi-ọha imigwe g'èphe hakọtakpoo; bya akakọtakwapho ndu nọkwapho l'oke ọkwa l'imigwe.

¹¹Sù-a; ọ kwa teke ono, unu l'iya byaru bya atũgba bũru nanũ ono bẹ e buru unu úbvù; mbụ úbvù ọphu abũdu ẹka bẹ e gude bua ya unu. Ọo Kéreshi l'onwiya bụ onye buru iya unu. Úbvù ono, o buru unu ono bũkwa ogwèhu unu l'ọphu bẹ o yefuru unu g'onye yefuru uwe; mbụ ogwèhu unu ọphu iphe-èji shi phawaa kutukutu. ¹²Lẹ teke ono, e meru unu baptizimu ono bẹ a tũkoakwaru unu lẹ Kéreshi likọta elili. Tẹme Chileke tũkokwapho unu l'iya mee unu tũko shi l'onwu teta dzũru ndzũ. Noo l'unu kwetarũ l'ike dũ Chileke bya achĩru ọpfu ye l'ike iya ono; mbụ ike ọphu, o gude mee Kéreshi o shi l'onwu teta dzũru ndzũ. ¹³O nweru teke unu shi nwũhu anwũhu kwaa l'ime iphe-èji unu; ọphu unu ebuduru úbvù; ọle nta bẹ Chileke byawarũ emee; unu lẹ Kéreshi tũko nọdu ndzũ; ọ gũkotaru anyi nvũ l'iphe, bũkpoo iphe-èji, anyi meru g'ọ ha. ¹⁴Ọ tũkochaa iphe ono, e deru edede l'èkwọ ono hushikọtachaa g'ọ ha; mbụ iphe ono, egoshi l'anyi darwũkotawaru iphe, ekemu iya pfuru, bụ iphe ono dũwaa g'ũgwọ, tọpyitaru anyi l'èkpĩri ono. Chileke mechaa nno bya atũko iphemiphe ono kpọpyabe l'oswebe shi ẹgube ono mee ya o rebuhu ire. Ọphu oo-rebaèdu ire je adũwaruro ya. ¹⁵Ọo teke phọ, Kéreshi nwũhuru l'oswebe phọ bẹ o chikporu ike iphe, bũkpoo ọchi-ọha, nọkota l'ephekerephe; mẹ ike iphe, bũkpoo ndu ọphu nọ l'oke ọkwa l'ephekerephe; kpua phẹ lẹ ndzũ kpufuta l'edzudzu-ọha teke ono, yẹbedua l'atũ okoo k'alwũ-gbu, ya lwũ-gburu phẹ ono.

¹⁶Ọo ya bụ; g'ọ tọ dũkwa onye a-bya anọdu akpọcha-pheru unu mkpọcha l'iphe, unu eri eriri mẹ l'iphe, unu angũ angũngu. Ọphu ọ dũkwa onye a-bya akpọchaaharu unu mkpọcha kẹ l'owaa iphe, unu aboje; g'unu dobekwa mbọku ọphuu boje iya abọbo; ọzoo l'onwa fũkwaru k'ọphúú g'unu watakwa iya abọbo; ọzoo k'iphe, unu e-meje mbọku atũta unme. ¹⁷Ekemu ndu Jiu ono g'ọ hakọta, e shi tũshia k'iphemiphe ono bẹ shi bũkotaru onyonyo iphe, l'e-mechaa mee l'iphu. Obenu l'ọphu bụ ọkpobe iya bụ Kéreshi. ¹⁸Ọo ya bụ g'unu te ekwekwa g'ọ dũru onye l'abya akpọshia unu anata obunggo ono, Chileke l'e-bu unu ono. Unu b'ekwekwa gẹ ndu ono, ọonoduje atso ọtso l'èphe emeje g'a sù l'èphe wozeru onwophẹ alị ono nafũ unu obunggo Chileke. Èphe anọduje epfu g'a bajeru unwu-ojozi-imigwe ẹja; èphe asũ l'iphe, èphe gbaberu ọkpa epfu iya bụ ọphuleny, èphe phũru. Ẹgube ndu ono anọdujeephọ eku onwophẹ iphe, èphe aha-dũ g'ọo ya. Ọ bũerupho egomunggo, enwedũ ishi bẹ èphe anọduje agba. ¹⁹Èphe ta anyatajèdu l'ọ dũru onye bụ ishi, bụ ẹka ogwèhu dze pfuru lẹ

nkwo iya lẹ nkwo iya; mękpoo akwara, dọkota l'ẹhu. Ọ buru ishi emeje ogwẹhu ono l'oovu evuvu gẹ Chileke tọberu.

Anwūhu waa eteta k'onye lẹ Kéreshi

²⁰Su-a; eshi ọphu unu lẹ Kéreshi tukuru nwuhukota bẹ Chileke bofua-kwaru unu l'eme iphe, ndiphe tọru ọkpa iya, sù g'e tsoje. ?Bù gunu meru g'o gude unu nọdu emekwadua gẹ ndu bukwađu ndu mgboko-a; emekwađu iphe, ekemu pfuru, bù ọphu suru: ²¹“B'ebiykwa ẹka lẹ nri ọwa! B'edekwa ọwa-a ire; ọphu i denyikwa ọphuu ẹka?” ²²Iphe, bukpo ekemu ono g'ọ ha tųkokwaru bọleru-a iphe, nemadzų ezi waa iphe, a tọru ọkpa iya sù g'etsoje. Noo kẹle iphe, eeri eriri bù e -richawa iya bẹ ọ bvųwaru. ²³Iphe ono, ẹphe ezi ono adųjekwa g'o shi lẹ mmamiphe; bya abųru iphe, nemadzų gude ẹka kotaru onwiya; buru ndu eme g'a sù l'ẹphe wozetaru onwophe alį; buru ndu anų ogwẹhu phe aphų. Ọle iphemiphe ono ta adųkwa ọphu eyetajeru phe ẹka g'ẹphe sede onwophe l'egu ẹjo-iphe, lagų phe nu.

3 ¹Su-a; eshinu Chileke mewaru unu lẹ Kéreshi tųko shi l'onwu teta dzųru ndzų; unu chojenu ọzo, unu e-shi g'iphe ono, dų l'imigwe ono rwube unu ẹka; mbų iphe, dų l'ẹka ono, Kéreshi nọ l'ẹkutara Chileke ono. ²Unu woru uche unu dobe l'iphe ono, dų l'eli ono; unu te ewoshiru iya dobe l'iphe kẹ mgboko l'ẹka-a. ³Noo kẹle unu nwuhuru anwūhu. Ndzų unu bẹ Kéreshi wowaru domia l'ẹka Chileke. Kéreshi nọdukwanu l'ime Chileke. ⁴Ọo Kéreshi bẹ bù ọkpobe ndzų anyi g'anyi hakọta. Teke ono, Kéreshi a-bya ọzo ono bẹ unu e-tsokwaru iya phọ bya. Unu l'iya agbarų mgba l'ọdu-biribiri iya.

⁵Ọo ya bù; unu pyi-gbushia iphe, bukotakpoo iphe kẹ mgboko-a, bù iphe, dzųkwadu ndzų l'ẹhu unu, bù iya bù; apharwųshi onwonye; umere, rehuru erehu mẹ ẹgu eme ẹjo-iphe; iji-ẹnya mẹ ẹnya-pfųrupfuru, bųhukwapho agwa ọbvų. ⁶Ọo iphemiphe ono bẹ l'e-me g'oke-ẹhu-eghu kẹ Chileke dapfu ndu ta nųdu iphe lẹ nchį. ⁷Ọo nwekwarų-a teke unubędua shi emegbaa iphemiphe ono, bù iya bù teke ẹjo-iphe ono shi gudegbaa ndzų unu eme g'ọ dų iya.

⁸Ọle nta-a bẹ unu a-ha iphemiphe ono. Unu haa ẹhu-eghu; obu ọku; edoberu nwibe unu ẹjo obu; ephu nemadzų iphu. G'opfu erehu te eshi-jekwa unu l'onu. ⁹Unu ta adųjekwaru nwibe unu ọka; eshinu unu hakọtawaru akahų umere ono yẹ ẹjo ememe, tso iya nu. ¹⁰Ọo ya bù g'unu yee umere ọphųú ono g'onye yeru uwe. Ọ kwa Chileke ono, nųru unu umere ọphųú ono anọduje eme unu g'unu kabaa abųru ndu o meru k'ọphųú. Ọo ya bù g'unu amakọtaru onye Chileke bù; marwee ya amarwe k'ọphu unu a-nọdu akabaa adų g'ọ dų kwasẹru. ¹¹Eshinu ọ dųwaa nno bẹ a ta akpahẹkwa ishi kẹ l'onye ọphuu bù onye Jiu; onye ọphuu buru onye abųdu onye Gurisu; onye ọphuu buru onye buru úbvù; ọphu onye ọphuu

ebuduru. Onye ọphuu bụ nlwamulwa; onye ọphuu buru onye ime-ọswa. Onye ọphuu bụ ohu; onye ọphuu buru amadu. Ọ buwaa Kéreshi bụ mkpakọ lẹ nswikọ; tẹme o buru l'ime onyemonye.

¹²Unu bụ unwu Chileke. O yeru unu obu bya ahota unu g'unu buru ndu nkiya. Noo g'o gude unu je aphujeru nemadzu obu-imemini; nwejeru obu omaa; unu wozeje onwunu ali; meje odo; unu atajeru iphe nshi. Unu tuko iphe ono g'o hakota chita yee g'onye yeru uwe. ¹³Nwibe unu -mee unu eji; unu tagbuje iya lẹ nshi. Teke nemadzu meru unu iphe, unu a-ta onye obu uta; unu aguaru iya ya nvu. Nnajiuphu guakwaru unu nvu l'iphe-eji unu. Ọo ya bu; unu gujekwaru ndu ozo nvu m'ephe meswee unu. ¹⁴Ọphu kachakponu l'iphemiphe ono bụ g'unu yee nwibe unu obu. G'o chikobe unu g'unu tugba buru nanu okpobe aburu. ¹⁵G'ehu-guu ọphu shi Kéreshi l'eka nodukwa l'obu unu; duzi unu uto; kele ọo ya meru g'o gude Chileke kukobe unu g'unu bya aburu ogwehu lanu. Unu keleje Chileke ekele iphe onoya.

¹⁶Unu kwe g'opfu ke Kéreshi ono bya eburu l'ime obu unu dzua ya oke lẹ mmamiphe; ezi iphe; yele adu nwibe unu obu. Unu egudekwa iya pho aloru phe eka lẹ nchi. Unu guje ebvu-oma nu Chileke; me ebvu ekele; me ebvu ozo, shikota Unme-du-Nso l'eka. Unu gude obu unu g'o ha meje iphemiphe ono; gude nno ekele Chileke ekele. ¹⁷Iphe, bukpo iphe, unu epfu epfufu me iphe, unu eme ememe; unu gudeje epha Nnajiuphu, bu Jizosu Kéreshi mekotaje iphe obu. Mbua; unu shije Kéreshi l'eka keleje-kelepho Chileke, bu Nna ekele.

Umere, ee-meje l'unuphu ndu ke Kéreshi

¹⁸Unube unwanyi; unu wozejekwaru ji unu onwunu ali; kele ọo ya bu iphe, gbaru onye etso Nnajiuphu l'ememe.

¹⁹Unube unwoke; unu yeje nyee unu obu. Unu ta adujekwaru phe ehuka.

²⁰Unube unwegirima; unu nujeru ne lẹ nna, nwuru unu opfu l'iphemiphe, ephe epfuru unu. Noo l'oo iphe, du Nnajiuphu ree bu ono.

²¹Unube nna; unu te emejekwa unwegirima unu iphe, e-ghu phe egbu; anonya obu dahu phe adzulakpa.

²²Unube ndu bu ohu; unu mejekwa iphe, ndu bu nnaji unu k'eliphe-a ziru unu. Ọ to bukwapho teke ephe ele unu enya be unu e-meje iya g'eeshi g'aa-jaa unu ajaja. Unu gudejekpopho obu iphoro me iya. Iphe, unu azobeje eme iya aburu lẹ Chileke duru unu lẹ nso. ²³Iphe, bu iphe, unu emekpo; unu phubeje iphu me iphe obu maru l'oo Nnajiuphu anyi be unu emeru iya. Unu te emejekwa iya g'o bu nemadzu be unu emeru iya. ²⁴Unu nyatajekwa l'oo Chileke be l'e-bu unu obunggo iya, bu iya bu lẹ Nnajiuphu l'a-nu unu iphe ono, o kwetaru ndu nkiya ukwe iya ono. Noo kele ọo Kéreshi bu Nnajiuphu, be unu ejeru ozi. ²⁵Ọle onye eme iphe-eji

bẹ Chileke a-pfukwanu ugwo ophu gbaru iya nu; m'obeta onye obu buru onye. Noo le yebedua, bu Chileke ta adudu onye oole enya l'iphu.

4 ¹Unube ndu bu nnajjuphu; unu mejekwaru ohu unu iphe, pfuru oto me iphe, rwuberu phe nu. Unu nyatajekwa l'unubedua nwekwarupho onye bu Nnajjuphu unu, bu l'imigwe.

Iphe unu e-meje

²Unu yemia ishi l'epfu anu Chileke; unu eche nche; ekelejekpoe ya pho ekele. ³Unu pfujekwarupho opfu ehuru anyi nu Chileke su iya g'o mee g'anyi nwejeru aka anyi e-zije ozi-oma ono; mbu g'anyi zije k'iphe ono, Chileke shi domia edomi, bu iya bu Kereshi l'onwiya. O kwa k'ozi-oma ono be o gude a tua mu mkporo-a. ⁴Unu pfujekwarupho nu iya g'o mee mu ge mu duje ike pfuje iya g'o doo enya le g'o gbaru mu l'epfufu iya.

⁵Unu meje umere ndu maru iphe l'iphu ndu abudu ndu ke Kereshi. Unu ta ahajekwa uzo duru unu g'o laa ke mmanu. ⁶G'opfu unu guje egugu; dujeepho g'iphe, unu tsuru; k'opfu ooheje ndu unu epfuru iya ihee angaberu unu nchi. Unubedua amakwanuru g'unu e-yejeru onyemonye onu l'opfu.

Ekele ikpazu

⁷Tikikosu e-pfukotarua unu ge mu eme ala. Yebedua bu nwanna anyi, anyi yeru obu; bya aburu onye-ozoma, e gude ire iya aka; bya aburu onye anyi l'iya tukoru eje ozi ono. ⁸Mu ziru Tikikosu obu g'o bya ndu-unu bya akooru unu g'anyi l'eme ala; teme l'oo-mekwapho g'obu shihu unu ike. ⁹Onye anyi tukoru ye l'iya ezi gephe bya ndu-unu ono bu Onesimosu, bu onye anyi yeru obu; bukwarupho onye goshifuakwarupho le ya gbaru ge gude ire iya aka; mbu Onesimosu k'ibe unu. Ephenebo ono akwaruro unu g'iphemiphe, du l'ibiya-a.

¹⁰Arisutakosu, bu onye mu l'iya tukoru nodu le mkporo lekelekwaro unu. Maku nodu ekelekwapho unu; mbu nwa nwune-nna Banabas. E zihakwaru nzi ehuru iya; o rwua unu nchi. Teke o shitaru uzo ibiya k'unu; unu goshijekwa iya l'ehuru atso unu utso lo byaru. ¹¹O nodu ekelekwapho unu mbu Jizosu ono, eekuje Jiosutosu ono. Oo umadzu eto ono be bukwa ndu Jiu, tso mu eje ozi ono, anyi eje gude egoshi lo Chileke bu eze ono. O buru phe be anoduje adu mu obu.

¹²Epfufuru k'ibe unu ekelekwapho unu. Yebedua be bukwa onye ejeru Kereshi Jizosu ozi. Oogudeje obu iya g'o ha phube iphu epfu anu Chileke l'ishi ehuru unu epfushi iya ike. Ge Chileke mee g'unu ba akpojeru laa azu; loomekwapho unu: unu amakotaru umere, gbaru onye ke Kereshi l'ememe okpobe amaru; loomekwapho g'o heje unu ihee emebekota iphe, du Chileke l'uche. ¹³Mbedua epfukpo l'onwomu su loosekpo akanya ehuru unu eseshi iya ike; mekpoo akanya ehuru ndu Layodeshiya; me ke

ndu Hiyerapọlisu. ¹⁴Onye ọkinta ono, anyi yeru obu ono, bu Luku l'ekelwaro unu. O nodu ekelekwapho unu mbu Dimasu.

¹⁵Unu keleru anyi unwunna anyi phe ono, no le Layodeshiya. Unu ekeru anyi Nimfa me Chiochi ono, edzukobeje l'ibe iya ono. ¹⁶Unu -guchaa ekwo-ozia l'ibiya k'unu; unu mekwaa ya go rwua ndu Layodeshiya aka k'ophu ephedua l'a-gukwa iya pho. Unu agukwaapho ekwo-ozia ophu shi Layodeshiya. ¹⁷Unu zia Akiposu le mu suru go kukebekwa ehu jebe ozi ono, e ziru iya go jee l'ozia ono, anyi ejeru Nnajiuphu ono.

¹⁸Oo mbedua, bu Polu gude aka mu ede owa-a nta-a gude ekele unu. Unu ta azohajekwa le mu no le mkporo.

Ge Chileke meeru unu eze-iphe-oma. Nokwa go du.